

यहूदा की चिट्ठी

1यीशु मसीह के सेवक अर याकूब के भाई यहूदा की ओड़ तै थम लोगां के नाम जो पणमेसर के प्यारे तथा यीशु मसीह कै खात्तर सुरक्षित तथा पणमेसर कै जरिये बुलाए गये सैं।

2थारै ताहीं दया, शान्ति अर प्रेम भोत ए घणा मिल्दा रहवै।

पापी दण्ड पावेंगे

3प्यारे ढबिबियों, हालाके मैं भोत चाहूँ था के थारै ताहीं उस उद्धार कै बाबत म्ह लिखूँ, जिसके हम साझिदादा सां। मन्ने थारै ताहीं लिक्खण की अर थारै ताहीं हौसल्ला दुवाण की जरूरत अनुभव करी ताके थम उस बिश्वास कै खात्तर संघर्ष करदे रहो जिस ताहीं पणमेसर नै संत जनां ताहीं सदा सारीहाण कै खात्तर दे दिया सै। 4क्यूँके म्हारे टोळ म्ह कीमे लोग चोरी तै आ बडे सैं। इन लोगां के दण्ड कै बाबत म्ह शास्त्रां नै भोत पहल्या ए भविष्यबाणी कर दी थी। ये लोग बिना पणमेसर के सैं। इन लोगां नै पणमेसर के अनुग्रह ताहीं भोग-विलास का एक बहान्ना बना दिया सै तथा ये म्हारे प्रभु तथा ऐकले मालिक यीशु मसीह ताहीं कोनी मांदे।

5मैं थारै ताहीं याद दुवाणा चाहूँ सूं (हालाके थम तो इन सारी बाततां नै जाणो ए सो) के जिस प्रभु नै पहल्या अपणे लोगां ताहीं मिस्र की धरती तै बचाकै लिकाड लिया था, बाद म्ह जिन्नै बिश्वास ताहीं नकार दिया, उन्नै किस ढाळ नास कर दिया गया। 6मैं थारै ताहीं न्यू भी याद दुवाणा चाहूँ सूं के जो दूत आपणी प्रभु सत्ता ताहीं बनाए कोनी राख सके, बल्के जिन्नै अपणे निजी निवास ताहीं उस भीषण दिन कै न्याय कै खात्तर अन्धकार म्ह जो सदा कै खात्तर सैं बन्धनां म्ह राख्या सै। 7इस्से ढाळ मैं थारै ताहीं न्यू भी याद दुवाणा चाहूँ सूं के सदोम अर अमोरा तथा औरै-धारै के नगरां नै इन दूतां कै समान ए यौन अनाचार करया तथा अप्राकृतिक यौन सम्बन्धां कै पाच्छै भाज्दे रहे। उन्नै कदे भी कोनी बुझण आळी अग्नि म्ह झोंक देण का दण्ड दिया गया। वे म्हारै खात्तर उदाहरण कै रूप म्ह स्थित सैं।

8ठीक इस्से तरियां म्हारै टोळ म्ह घुस आण आळे ये

लोग अपणे सपणयां कै पाच्छै भाज्दे होए आपणी देहीयां नै बिगाड़ण लागरे सैं। ये प्रभु कै सामर्थ्य ताहीं उठाकै ताक पै धरै सैं तथा महिमावान सुर्दुत्तां कै बिरोध म्ह बोल्लै सैं।

9प्रधान सुर्दुत मिकाइल जिब शैतान कै गेल्या रोळा करदे होए मूसा की लाश कै बारै म्ह बहसण लागरया था तो ओ उसकै खिलाफ बेजती आक्षेपों के इस्तेमाल की हिम्मत कोनी कर सक्या। उसनै मात्र इतना कह्या, “प्रभु तैरे ताहीं डाँट-फटकारे।”

10किन्तु ये लोग तो उन बाततां की बुराई करै सैं, जिन ताहीं ये समझदे ए कोनी अर ये लोग बेअक्ले पशुआं कै बरगे जिन बाततां तै सहज रूप तै परिचित सैं, ये बात वैए सैं जिनतै उनका नास होण नै सै। 11उन लोगां के खात्तर यो भोत भुंदा सै के उन्नै कैन कै जिसे ओए राह छांटया। धन कमाण कै खात्तर उन्नै अपणे आप ताहीं उस्से तरियां ए गलती कै हवाले कर दिया जिस तरियां बिलाम नै करया था। इस तरियां तै वै ए नास हो जावेंगे जिस तरियां कोरह के बिरोध म्ह हिस्सा लेण आळे नास कर दिए गये थे।

12ये लोग थारे प्रीति-भोजां म्ह उन लुकी होई चट्टानां कै बरगे सैं जो घातक सैं। ये लोग बिना डर कै गेल्या थारे संग खावें-पीवें सैं किन्तु उन्नै सिर्फ अपणे स्वार्थ की ए चिंता रहवै सै। वे बिना पाणी के बादळ सैं। वे पतझड़ के इसे दरखत सैं जिन पै फल कोनी होन्दा। वे दो बै मरे होए सैं। उन ताहीं उखाड़या जा चुक्या सै। 13वे समन्दर की इसी भयानक लहर सैं, जो अपणे सरम तै भरे काम्मां का झाग उगल्दी रहवै सैं। वे उरान-परान भटकदे इसे तारे सैं जिनकै खात्तर अनन्त गहन अन्धकार पक्का कर दिया गया सै।

14आदम तै सातमी पीढी हनोक नै भी इन लोगां के खात्तर इन शब्दां म्ह भविष्यबाणी करी थी: “देक्खो ओ प्रभु अपणे हजारों-हजार सुर्दुत्तां कै गेल्या 15सारे लोगां का न्याय करण कै खात्तर आण लागरया सै। ताके लोगां नै जो भूँडे काम करे सैं, उन्नै उनकै खात्तर अर उन्नै जो पणमेसर कै खिलाफ भूँडे बचन बोल्ले सैं, उनकै खात्तर दण्ड दे।”

16ये लोग चुगलखोर सैं अर दोष टोहण आळे सैं। ये आपणी इच्छायां के दास सैं तथा अपणे मुँह तै घमण्ड आळी बात बोल्लै सैं। अपणे फैयदे कै खात्तर ये दुसरयां की चापलूसी करै सैं।

कोसिस करदे रहण कै खात्तर चेतावनी

17किन्तु प्यारे ढब्बियों, उन शब्दां नै याद राखो जो म्हारे प्रभु यीशु मसीह के प्रेरितां के जरिये पहल्या ए कहे जा चुके सैं। 18वे थारै तै कह्या करै थे के, “आखरले बख्त म्ह इसे लोग होवेंगे जो पणमेसर तै जो कीमे सम्बन्धित होगा उसका मखौल करैगे।” तथा वे अपवित्र इच्छायां के पाच्छै-पाच्छै चल्या करैगे। 19ये लोग वै ए सैं जो फूट डलवावै सैं।

20ये लोग आपणी प्राकृतिक इच्छायां के दास सैं। इनकी आत्मा कोनी सैं। किन्तु प्यारे ढब्बियों थम एक दुसरे ताहीं आध्यात्मिक रूप तै अपणे पवित्र बिश्वास म्ह जमा मजबूत

करदे रहो। पवित्र आत्मा कै गेल्या प्रार्थना करो। 21म्हारे प्रभु यीशु मसीह की करुणा की बाट देखे होए, जो थारै ताहीं अनन्त जीवन लग ले जावेगी पणमेसर की भक्ति म्ह लीन रहो।

22जो डावाँडोल सैं उन पै दया करो। 23दुसरयां ताहीं आगै बढ़कै आग म्ह तै लिकाड़ ल्यो। किन्तु दया दिखान्दे बख्त चौकन्ने रहो तथा उनके उन लत्यां लग तै नफरत करो जिन पै उनके पाप तै भरे स्वभाव के धब्बे लगे होए सैं।

पणमेसर की स्तुति

24इब उसके बाबत जो थारै ताहीं पड़ण तै बचा सकै सै तथा उसकी महिमा तै भरी उपस्थिति म्ह थारै ताहीं महान आनन्द कै गेल्या बेकसूर करकै पेस कर सकै सै। 25म्हारे प्रभु यीशु मसीह कै जरिये म्हारे उद्धारकर्ता उस ऐकले पणमेसर की महिमा, वैभव, पराक्रम अर अधिकार सदा-सारीहाण तै इब लग अर युग-युगांतर लग बण्या रहवैं। आमीन! 🌿

नोट्स
